



ATASSUT

21.10.2015

Steen Lyngø

UKA 2015/113

**Naalakkersuisut oqartussaaffiit nunatsinnut angerlaassassarineqarsinnaasut ilanngussaq 1-imi allassimasut Namminersorlutik Oqartussat inatsisaani allassimasuni suliassaqarfiit pineqartut pillugit Naalakkersuisut nalunaarusioqqullugit peqquneqarnissaanik Inatsisartuni aalajangiiffigisassatut siunnersuut. Nalunaarusiaq, kingusinnerpaamik UPA2018-imi Inatsisartunut saqqummiunneqartussanngortitassaq, suliassaqarfiit ataasiakkaani tamani tulliuttunik nalunaarsuiffiussapput:**

**a. Suliassaqarfiup ingerlanneranut ullumikkut Naalagaaffimmut qanoq akeqarpa, Kalaallit Nunaannullu qanoq akeqassava illersorsinnaasumik suliassaqarfik ingerlatissappagu?**

**b. Suliassat ingerlannissaani piginnaasat suut eqquutsinneqassappat, Kalaallit Nunaanni Namminersorlutik Oqartussat suliassaqarfik ingerlanneqartumik illersorneqarsinnaasumik ingerlatsissaguni?**

**c. Iluaqutigineqartussat pitsaanngequtillu suliassaqarfiit ingerlanneqartut angerlaannerini suut kingunerissavai?**

**d. Suliassaqarfiit ingerlanneqartut angerlaannissaanni suliassat piffissami sivikitsup iluani, piffissami akunnattup iluani imaluunniit piffissap sivisuup ingerlanerani sularineqarlutik tulleriissarneqarnissai Naalakkersuisunit ingerlanneqartussaasorivaat?**

(Inatsisartunut ilaasortaq Aqqaluaq B. Egede, Inuit Ataqtigiit)

Siunnersuuteqartup siunnersuummini oqariartuutigisaa inuiattut ataatsimut anguniagaqatigiinnerup ersernerlussinnaanera pillugu ilaatigut ATASSUT-mit isumaqataaffigisinnaavarput. ATASSUT-ip aamma isumaqataaffigivaa, inuiattut namminersorerup atuutilersinneqarnerata kingorna qanoq nunatta alloriaqqinnissaa pissanersoq isummatta assigiinngisitaartuunera. Tamanna pissusissamisoortumik nammineq oqartussaanerup annertutiginissaanik qanorlu pinissaanut kissaatigisatta assigiinngitsuuneranik tunngaveqarpoq.

Nunarsuarmi inuiaat sumiikkaluarunilluunniit imminut oqartussaaffiginissamik arlaatigut kissaateqartuutarput. Aamma Kalaallit Nunaanni susassaqarfiit assigiinngitsut akisussaaffigileriarnerisigut imminut oqartussaaffigineruleriartorpoq.



Kisianni imminut oqartussaaffiginerulerneq susassaqarfinnik assigiinngitsunik akisussaaffiginnilernikkuinnaq kisimi pisinnaanngilaq.

Oqartussaaqataanermik misigisimaneq imminullu oqartussaaffiginninneq inunni ataasiakkaaniippoq tamannalu kisimi pisinnaavoq inuup ulluinnarni inuunerminut qanoq periarfissanik atorluaatiginerani.

Pissutsit piviusut imaapput, innuttaasut ataasiakkuutaa qanoq imminut oqartussaasutut misigisimaneq annertuumik ilinniagaqarsimanermik tunuliaqummit aallaaveqartarpoq. Innuttaasoq ilinniarluarsimanerugaangami taava aamma inuiaqatigiinni sunniuteqaqataanissamut misigisimaneq annertunerusarpoq.

Taamaattumik Nunatta pisariaqartippaa qaffasinnerusumik ilinniarsimanerup suli annertusarneqarnerunissaa, tassuunakkut innuttaasut ataasiakkaat ulluinnarni inuunerminnut sunniuteqarnerulersikkumallugu.

Aappaattut, inuiaqatigiinni sunniuteqaqataanermik misigisimaneq ilaatigut aamma inuiaqatigiinni politikikkut inerissimassutsimik aallaaveqartarpoq.

Ajoraluartumik ullutsinni kukkuluttortoqarsimagaagat Inatsisartut annertuvallaartumik appisaluussinnermut atorneqartarput, malugalugu kukkussutsit arlalitsigut allaffissornikkut kukkuluttornermik peqquteqartut. Allaffissornikkut kifpartuussinerup pitsaassutsimikkut inissisimaneq isornartorsiunngivillugu taava partiit illuatungeriit imminnut sassutaaralutik aallartittarput ilaatigullumi aamma Naalackersuisooqatigiinnut saassussisoqartarluni kukkusoqarsimaneq pillugu, naak amerlasuutigut allaffissornermi amingartumik imaluunniit kukkusumik siunnersorneqarsimanerup malitsigisaanik uffa aallaavillit. Tamatumap takutiinnarpaa Kalaallit Nunaanni politikikkut ineriartornermi qanoq inerissimannngitsigineq.

Assersuutitut taaneqarsinnaapput nunani allani inatsisartoqarnermi ineriartorsimanerup qanoq siuarsimanerutiginerani, tamakkumi suleqatigiit illuatungeriillu akunnerminni isumaqatigiillutik pissutsit tamakku isornartorsiortarmatigit taamaasillunilu allaffissornermut saatsinneqartarluni, allaffissornerup iluani kukkuluttorneq pisimappat. Tamanna takussutissaannaavoq politikkerit inuiaqatigiinnik aqutsinermik illersuinerat, tassalu demokratiip sanarfineqarnerani tunngavik, imaaliinnaratik imminut kusassarniaannarlutik demokratiimik tunulliusseq. Tassa politikikkut inerissimassuseq.

Siusinnerusukkat ATASSUT-mit oqariartuutigisarsimavarput, demokratimik ilinniarfeqartariaqartoq, inuiaqatigiinni demokratiimik qaammaasaqarnerulernissamik



suliaqartussamik. Suli sulissutigissavarput demokratiimik ilinniarfimmik angalaartussamik pilersitsinissaq.

ATASSUT-ip namminersulernissamut akuersaarnikuuvoq aammalu isumaqataalluni Kalaallit Nunaata taamaalluni politikkikkut aningaasarsiornikkullu nammineersinnaanerup angunissaa.

Taamaattorli, ATASSUT-mit isumaqarpugut inuiattut ullumikkut annerusumik imminut oqartussaaffiginermik akisussaaqataanermik misigisimanerup annerulersinnaaneranut aqutissat pingaarnersarigaat ilinniarsimassutsikkut qaffasinnerusumik inissisimalerneratigut nunattalu demokratiimik aallaavilimmik pitsaanerusumik ineriartortinnissaa, akisussaaffinnik amerlanerusunik tiguseqqaanngikkaluarluni.

Taamatut oqaaseqareerluta, ATASSUT-mit siunnersuutip imai itigartikkusunngilavut.

Taamaattumillu siunnersuutip suliarineqarnerata ingerlateqqinneqarnissaa innersuussutigerusullutigu.

Oqaaseqarsinnaaninnut qujanaq.